

AUGLÝSING

um gildistöku ákvæða er leiða af samningnum um Evrópska efnahagssvæðið vegna vöruflutninga á landi.

1. gr.

Ákvæði ákvarðana sameiginlegu EES-nefndarinnar nr. 20/94 og 60/95 um breytingu á XIII. viðauka við samninginn um Evrópska efnahagssvæðið, skulu öðlast gildi sem hér segir:

1. Eftirfarandi liður komi aftan við lið 26c:

26d. Reglugerð framkvæmdastjórnarinnar (EB) nr. 792/94 frá 8. apríl 1994 um nákvæmar reglur um beitingu reglugerðar ráðsins (EBE) 3118/93 varðandi fyrirtæki sem stunda vöruflutninga á vegum í eigin þágu.

2. Eftirfarandi bætist við lið 26c á undan aðlögunarliðnum:

„eins og henni var breytt með“:

Reglugerð ráðsins (EB) nr. 3315/94 frá 22. desember 1994 um breytingu á reglugerð (EBE) nr. 3118/93 um skilyrði fyrir því að farmflytjendur geti stundað flutningaþjónustu á vegum í aðildarríki þar sem þeir eru ekki búsettir.

2. gr.

Ofantaldar gerðir sem vísað er til í 1. gr. eru birtar í EES viðbæti við Stjórnartíðindi EB nr. 45, dags. 3. október 1996, bls. 63 og viðbæti nr. 50, dags. 17. desember 1994, bls. 69.

3. gr.

Auglýsing þessi, sem sett er samkvæmt heimild í lögum um vöruflutninga á landi nr. 47/1994 með síðari breytingum, öðlast þegar gildi.

Samgönguráðuneytinu, 1. október 1996.

Halldór Blöndal.

Ragnhildur Hjaltadóttir.

Nr. 577

1. nóvember 1996

SKIPULAGSSKRÁ

fyrir Verðlaunasjóð iðnaðarins.

1. gr.

Nafn, heimili.

Sjóðurinn heitir Verðlaunasjóður iðnaðarins. Heimili hans og varnarþing er í Reykjavík. Sjóðurinn var upphaflega stofnaður með stofnskrá sem staðfest var 23. mars 1976, og kemur þessi stofnskrá í stað þeirrar stofnskrár.

2. gr.

Tilgangur.

Tilgangur sjóðsins er að örva til dáða á sviði iðnaðarmála og jafnframt að vekja athygli á þeim afrekum, sem unnin hafa verið og unnin verða á því sviði.

Þessum tilgangi skal leitast við að ná m.a. með því að veita verðlaun, helst árlega, manni eða fyrirtæki, er unnið hefur eitthvað í þágu íslensks iðnaðar, er verðlaunavert þykir að dómi sjóðsstjórnar.

Stofnframlag sjóðsins er af gefendum helgað minningu þeirra fjölmörgu hugvits- og hagleiksmanna, sem fyrr og síðar hafa lifað og starfað á Íslandi, og misjafnrar umbunar notið fyrir verk sín.

3. gr.

Stjórn.

Stjórn sjóðsins skal skipuð 5 mönnum tilnefndum af eftirgreindum aðilum og skal tilnefningin gilda til tveggja ára.

Einum manni tilnefndum af fjölskyldu Kristjáns Friðrikssonar. Einum manni tilnefndum af Iðnaðarmannafélaginu í Reykjavík. Tveimur mönnum tilnefndum af Samtökum iðnaðarins, og skal annar þeirra ávallt vera formaður Samtaka iðnaðarins. Einum manni tilnefndum af félaginu Form Ísland.

Varamenn skulu útnefndir með sama hætti til jafnlangs tíma.

Stjórnin kýs sér formann, sem jafnframt er framkvæmdastjóri sjóðsins. Ef atkvæði eru jöfn, ræður atkvæði formanns.

4. gr.

Um stofnfé.

Upphaflegt stofnfé sjóðsins er framlag sem Últíma hf. gaf til stofnunar sjóðsins, 35 árum eftir stofnun þess fyrirtækis. Upphaflegur stofndagur sjóðsins telst 3. mars 1976.

Sjóðsstofnunin var ákveðin með fundarsamþykkt í stjórn Últímu hf. þann 10. október 1975 og staðfest á hluthafafundi sama félags þann 3. mars 1976.

Til þess er ætlast af gefendum, að verðlaunaafhending úr sjóðnum fari fram á Iðnþingi.

Stofnféð var nýrri hluti húseignar Últímu hf. í Kópavogi, þ.e. vestara húsið að Skeljabrekku 4. Bygging þessi er 162 fermetrar að flatarmáli, aðalhæð auk kjallara. Brunabótamat í ársbyrjun 1976 var gkr. 10.457.000,00 -tíu milljónir fjögur hundruð fimmtíu og sjö þúsund krónur-.

Á eigninni hvíla engin veðbönd.

Verðlaunasjóður iðnaðarins nýtur arðs af eigninni frá 1. mars 1976 og greiðir frá sama tíma öll gjöld af eigninni.

Sjóðurinn tekur á móti gjöfum og áheitum. Sé um minningargjafir að ræða, sem verulegum upphæðum nema, skal færa nöfn gefenda og þeirra er minnst skal með gjöfunum, inn í gjörðabók sjóðsins, svo og í fylgirit, er fylgi með til þeirra, er verðlaun hljóta úr sjóðnum hverju sinni.

Samtök iðnaðarins skulu ávaxta lausafé og annast um eignir og reikningshald sjóðsins í samræmi við lög og reglur hverju sinni.

Heimilt er að selja fasteignina og ávaxta andvirði hennar á þann hátt sem sjóðsstjórnin telur best, án þess að um skerðingu á stofnfé verði að ræða, enda verði sú ráðstöfun samþykkt af dómsmálaráðherra.

Ekki skal taka á móti umsóknum um verðlaun úr sjóði þessum. Sjóðsstjórn skal þó heimilt að auglýsa eftir ábendingum.

Við val verðlaunaþega skal eftirgreint haft í huga:

1. Verðlaun skal gjarnan veita fyrir uppfinningar, sem líklegar teljast til að koma íslenskum iðnaði að gagni.

2. Verðlaun má einnig veita einstaklingum og fyrirtækjum fyrir happadrjúga forystu í uppbyggingu iðnaðar, hvort sem er til innanlands nota eða til sölu erlendis, eða fyrir forystu á sviði iðnaðarmála almennt.

3. Verðlaun má veita fyrir sérlega vel gerða iðnaðarframleiðslu t.d. sem fram kynni að koma á iðnsýningum eða kaupstefnum.

4. Verðlaun má einnig veita fyrir hönnun, sem er sérlega vel heppnuð að dómi sjóðsstjórnar.

Ofangreind upptalning er gerð til leiðbeiningar fyrir sjóðsstjórnina um það, hvað fyrir stofnendum vakti með sjóðsstofnuninni.

5. gr.

Verðlaunaafhending.

Verðlaun skulu að jafnaði veitt annað hvert ár á Iðnþingi. Verðlaun skulu afhent í formi peningaupphæðar. Verðlaunum skal fylgja skjal heft inn í skinnband, þannig gert, að það megi hengja á vegg og komi fram á forsíðu hverjum verðlaunin eru veitt og fyrir hvað, ásamt undirskrift sjóðsstjórnar.

Að öðru leyti ákveður sjóðsstjórnin hverju sinni tilhögun verðlaunaafhendingar.

6. gr.

Breytingar og sjóðsslit.

Ef eitthvað það ber að höndum, er veldur því, að sjóðurinn verði með samþykkt sjóðsstjórnar lagður niður, skulu eignir hans renna til viðurkenndrar líknarstofnunar samkvæmt ákvörðun sjóðsstjórnarinnar. Breytingar má gera á skipulagsskrá sjóðsins ef það telst nauðsynlegt eða heppilegt vegna breyttra aðstæðna en til þess þarf samþykki allra stjórnarmanna.

7. gr.

Sjóður þessi kemur í stað Verðlaunasjóðs iðnaðarins sem stofnaður var með skipulagsskrá, sem staðfest var 23. mars 1976.

8. gr.

Leita skal staðfestingar dómsmálaráðherra á skipulagsskrá þessari.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytinu, 1. nóvember 1996.

F. h. r.

Þorsteinn Geirsson.

Fanney Óskarsdóttir.